



SAKSGANG		
Styre, utval, komite m.m.	Møtedato	Saksnr
Formannskapet	23.04.2015	045/15

Avgjerd av: Formannskapet	Objekt:	Arkivsaknr.:
Saksbehandlar: Trine Alme	Arkiv: V45	11/598-6

Uttale til høyring: NOU 2014:15 - Norsk pelsdyrhald

Ingen vedlegg.

NOU-en kan lesast i sin heilskap på heimesida til regjeringa – regjeringa.no – under Landbruks- og matdepartementet.

Bakgrunn for saka:

Landbruks- og matdepartementet har sendt NOU 2014:15 «Norsk pelsdyrhold – bærekraftig utvikling eller styrt avvikling? Gjennomgang av pelsdyrnæringa» på høyring. Høyringsfrist 27. april 2015.

Saksutgreiing:

Pelsdyrutvalet, oppnemnd hausten 2013 av Stoltenberg II, har hatt som mandat å gå gjennom pelsdyrnæringa og finne ut om det er grunnlag for vidare drift eller om næringa skal fasast ut.

Pelsdyrnæringa i Noreg er i dag ei lønsam og internasjonalt konkurransedyktig næring. Næringa er omstridt, der det ofte vert trekt fram dyrevelferd og om føremålet med næringa er akseptabel.

Utvalet leverte si innstilling 15. desember 2014. Det har vore ein open og grundig prosess. NOU-en som ligg føre famnar historia, no-situasjonen og utfordringane til næringa, og drøfting av dei to ulike alternativa frå mandatet.

Eit fleirtal i utvalet går inn for berekraftig utvikling av næringa dersom regelverket med forbetringar vert følgt.

I Gloppen kommune var det ti farmarar som søkte om produksjonstilskot på 2174 revetisper i januar i år. I 2005 vart det søkt frå 35 farmarar på 4182 dyr og i 1996 65 farmarar som søkte på 5871 dyr. Tre av dei ti farmarane har også mink. Det vart søkt på 2715 minktisper i år. I 2005 var det 4 farmarar som søkte på 1052 dyr og i 1996 var det 1 farmar som søkte på 125 dyr.

I Sogn og Fjordane var det 20 farmarar som søkte produksjonstilskot på 3452 revetisper og 6 farmarar som søkte produksjonstilskot til 7105 minktisper i januar i år.

Økonomiske konsekvensar for kommunen:

Ingen direkte. Det kan bli færre aktive gardbrukarar og på det viset færre lokale arbeidsplassar og vidare mindre skatteinngong.

Rådmannen si vurdering:

Historisk sett har pelsdyr vore særst viktig for landbruket i Gloppen kommune. I tunge tider har pelsdyra vore med på å halde liv i gardane. Det har også innanfor pelsdyrnæringa, til liks med dei andre produksjonane i landbruket, skjedd ei strukturendring mot færre og større einingar, og ein meir spesialisert produksjon.

Gloppen kommune har halvparten av pelsdyrfarmene i Sogn og Fjordane. Dette viser at pelsdyr er ei viktig næring for dei som driv oppdrett i dag.

Det er administrasjonen sitt syn at dei som driv i næringa er seriøse. Dei tek regelverket på alvor og prøver å følgje opp så godt dei kan. Oppdrettarane har høg kompetanse etter mange år i næringa. Mattilsynet har ei viktig rolle i tilsynsarbeidet. Næringa er underlagt ei tilsynsordning som er meir omfattande enn mange andre husdyrproduksjonar. Det er viktig at det vert sett i verk tiltak så raskt som råd, dersom det vert oppdaga brot på forskriftene om dyrevelferd. Dette for å unngå dyretragedie og dårleg omdøme for næringa. Dette vil og gjelde for alt anna dyrehold.

Det vil vere viktig for næringa å legitimere produksjonen sin. Open gard, og høve for ålmenta til å besøke ein pelsdyrgard for å sjå tilhøva, kan vere med å gi kunnskap om produksjonen til alle ved sjølvsyn, ikkje berre få informasjon gjennom media. Systematisk avlsarbeid og elektronisk journal kan vere med på å dokumentere stoda i næringa på ein meir vitenskapleg måte og vere eit verkty for å avle fram meir tillitsfulle dyr.

I Gloppen kommune har det i seinare tid vore lite utfordring med rømde dyr. For å unngå rømde dyr, kan betre sikring og tammare dyr vere eit godt utgangspunkt.

Det er eit politisk mål å ha landbruksnæring i heile landet. Pelsdyrnæringa har vist at dei kan stå på egne bein også i distrikta og vere konkurransedyktige på kvalitet opp mot store, internasjonale produsentar. Kvaliteten på skinn og tal kvalpar heng nøye saman med stell og god dyrevelferd.

Gloppen kommune støtter opp om konklusjonen frå fleirtalet i pelsdyrutvalet som går inn for berekraftig utvikling av næringa. Signal frå næringa er at dei håper på ei positiv avgjerd der dei får ro og tryggleik rundt drifta og rammevilkåra for å kunne satse for framtida. Dersom det skulle gå mot avviking, vil dei ha kort nedfasingstid, for å unngå ein lang overgangsperiode og seigpining av folk og dyr.

RÅDMANNEN SI TILRÅDING:

Gloppen kommune støtter opp om konklusjonen frå fleirtalet i pelsdyrutvalet som går inn for berekraftig utvikling av næringa.

23.04.2015 FORMANNSKAPET

045/15 VEDTAK:

Gloppen kommune støtter opp om konklusjonen frå fleirtalet i pelsdyrutvalet som går inn for berekraftig utvikling av næringa.

Vedtaket var samrøystes.